



Sumáriu Kazu

Abril 2013

Sumáriu prosesu julgamentu kazu iha Tribunál Distritál Oe-Cusse Semana daruak Abril 2013

Introdusaun

Hahú husi 09 to'o 12 Abril 2013, JSMP kontinua hala'ó aktividade monitorizasaun ba prosesu julgamentu iha Tribunál Distritál Oe-cusse.

Durante períodu semana daruak ne'e, JSMP konsege rejista total kazu hamutuk 10. Husi kazu 10 ne'e, kazu 2 kona-ba krime abuzu konfiansa, kazu 1 kona-ba ofensas ba integridade física simples ho natureza violénsia doméstika, kazu 1 kona-ba kazu krime maustratus ba kónjuje, kazu 1 kona-ba kazu tentativa omisídiu agravadu, kazu 1 kona-ba omisídiu simples, kazu 2 kona-ba violasaun seksuál ba minor, kazu 1 kona-ba violénsia ba domisíliu, no kazu 1 violénsia seksuál ba inkapaz.

Entre kazu hirak ne'e, maioria sei kontinua prosesu, kazu violénsia doméstika 1 mak konklui ho pena multa, kazu violénsia seksuál hasoru inkapaz 1 absolvidu tanba evidensia la suficiente no kazu abuzu konfiansa 1 tribunál la konsege hala'ó julgamentu, tanba a advogadu la marka prezensa.

Tuir mai deskripsaun sumáriu julgamentu kazu kompletu:

1. Kazu krime abuzu konfiansa agravadu Nú.81/C.Ord/2012/TDO

Kompozisaun Tribunál	: Koletivu
Juis	: Dr. João Ribeiro, Dr. Júlio Gantes no Dr. José Maria Araújo
Ministériu Públiku	: Dr. Oscar Tavares
Defeza	: Dr. Calisto Tout
Konkluzau	: Sei kontinua prosesu

Iha 09 Abril 2013, Tribunál Distritál Oe-Cusse hala'ó julgamentu ba kazu violénsia doméstika ne'ebé rejista ho Nú. Prosesu 81/C.Ord/2012/TDO. Arguidu ba kazu refere mak Jacinto Lafu no vítima mak "ONG Moris Rasik."Kazu ne'e akontese iha 31 Marsu 2011, iha Sub-Distritu Pante-Makassar, Distritu Oe-Cusse.

Audiénsia julgamentu hahú hodi lee akuzasaun husi Ministériu Públiku. Ministériu Públiku akuza katak iha 31 Marsu 2012, tuku 11.00 dader, arguidu nia Xefi husu arguidu hodi entrega orsamentu ho montante US\$ 2,561.00 ba organizasaun maibé arguidu la tuir. Arguidu la kumpri pedidu ne'e ho intensaun hakarak sai nain ba osan refere.

Relasiona ho aktu ne'e, Ministériu Públiku akuza arguidu nu'udar autór materiál tuir artigu 257 KP kona-ba abuzu konfiansa agravadu.

Arguidu rezeita akuzasaun Ministériu Públiku no deklara katak, nia foti duni osan refere maibé tanba NGO la selu ninia saláriu durante fulan tolu nia laran. Tanba ne'e nia prende osan ne'e too organizasaun selu ninia direitu depois mak nia intrega osan refere.

Mesmu nune'é, arguidu mós deklarara iha tribunál katak kazu ne'e sira rezolve ona, tanba nia integra ona osan ne'e, no organizasaun mós selu ona nia salariu. Iha alegasaun finál Ministériu Públiku husu ba tribunál atu kondena arguidu ho pena prizaun tinan 1 no sunpende ba tinan 2.

Maski nune'é, defeza husu ba tribunál atu absolve arguidu tanbá kazu ne'e sira rezolve tiha ona.

Prosesu leitura sentensa sei hala'o iha 15 Abril 2013, tuku 9:00 dadersan.

2. Kazu krime koasaun seksuál Nú.117/C.Ord/2012/TDO

Kompozisaun Tribunál : Koletivu
Juis : Dr. João Ribeiro, Dr.Júlio Gantes no Dr. José Maria Araújo
Ministériu Públiku : Dr. Oscar Tavares
Defeza : Dr. Calisto Tout
Konkluzau : Sei kontinua prosesu

Iha 09 Abril 2013, Tribunál Distritál Oe-Cusse hala'o julgamentu ba kazu abuzu seksuál ho Nú. Prosesu 117/C.Ord/2012/TDO. Arguidu ba kazu ne'e mak ho inisiál CF hasoru vítima EA. Kazu ne'e akontese iha 8 Janeiro2012, Sub-Distritu Pante-Makassar, Oe-Cusse.

Audiénsia hahú hodi lee akuzasaun husi Ministériu Públiku nian. Iha akuzasaun ne'e haktuir katak, iha 8 Janeiro 2012, maiz ou menus tuku 21: 00 kalan arguidu tama ba vítima nia uma no haree vítima toba dukur hela arguidu hi'it vítima nia kelen no koko atu hasai nia ropa laran ho obriga maibé, la konsege tanba vítima hader hodi hakilar halo arguidu tauk no halai.

Ministériu Públiku akuza tuir artigu 171 Kódigu Penál, kona-ba koasaun seksuál.

Arguidu rezeita akuzasaun Ministériu Públiku katak, iha momentu ne'ebá arguidu mai ho kondisaun lanu todan, nune'é arguidu mós la hatene saída mak akontese. Depois liu tiha loron ida hafoin vítima ba keixa.

Vítima deklarara katak, arguidu tama nia uma ho kondisaun lanu todan no husu atu halo relasaun seksuál ho vítima, maibé vítima basa arguidu dala rua no depois hakilar ho lian maka'as, nune'é halo arguidu ta'uk no halai sai husi uma laran.

Bazeai ba faktu sira ne'e, Ministériu Públiku altera tiha artigu 171 Kódigu Penál kona-ba violasaun ba artigu 185 Kódigu Penál kona-ba violénsia ba domisília. Alterasaun ne'e hala'o, bazeia ba deklarasaun husi arguidu no vítima iha audiénsia.

Ministériu Públiku husu ba tribunál atu fó pena prizaun fulan 9 no sunpende ba tinan 2.

Defeza husu ba Tribunál atu fo pena ne'ebé justu no adekuaudu ba arguidu tanba wainhira akontese arguidu iha kondisaun ne'ebé lanu todan no la hatene aan.

Prosesu ba leitura sentensa agenda fali ba iha 15 Abril 2013, tuku 10 : 00 dader-san.

JSMP hanoin katak alterasaun ba kualifikasaun juridiku ba krime ne'e la apropiadu no la koresponde ho aktu ne'ebé arguidu komete. JSMP mós hanoin katak kondisaun lanu, laos razaun ne'ebé relevante tuir lei atu altera nia kualifikasaun juridiku. Tuir JSMP kazu ne'e bele konsidera hanesan tentativa ba koasaun seksuál.

3. Krime violénsia seksuál hasoru adolexente Nú. 133/C.Ord/2012/TDO

Kompozisaun Tribunál : Kolektivu
Juis : Dr. João Ribeiro, Dr. Júlio Gantes no Dr. José Maria de Araújo
Ministériu Públiku : Dr. Oscar Tavares
Defeza : Dr. Sebastião Amado de Almeida
Konkluzau : Sei kontinua prosesu

Iha 9 Abril 2013, Tribunál Distritál Oe-Cusse, hala'o julgamentu ba kazu violénsia seksuál hasoru adolescente. Kazu ne'e julga ho Nú.Procesu 133/C.Ord/2012/TDO ne'ebé involve arguidu ho inisiál ME hasoru vítima MJT. Kazu ne'e akontese iha 1 Juñu 2012, Pante – Makassar, Distritu Oe-Cusse.

Ministériu Públiku akuza katak iha 1 Juñu 2012, maiz ou menus tuku 12:00 meudia arguidu no vítima hasoru malu besik vítima nia uma. Hafoin hasoru malu arguidu lori vítima ba lutu hún hodi kolu vítima nia ropa no nia ropa rasik hodi halo relasaun seksuál, vítima mós hakarak tanba arguidu promete atu kaben ho vítima. Momentu ne'ebá vítima sei tinan 15 no arguidu tinan 20.

Relasiona ho aktu ne'e, Ministériu Públiku akuza arguidu kontra artigu 178 Kódigu Penál, kona-ba aktu seksuál ho adolescente. Krime ne'e ho pena másimu tinan 5 prizaun.

Iha audiénsia arguidu deklarata katak, tempu ne'ebá sira konkorda ba malu atu halo relasaun seksuál arguidu promete ba vítima atu hola vítima maibé husi parte família mak la aseita.

Vítima mós deklarata katak sira halo duni relasaun seksuál tanba sira hadomi malu no antes ne'e arguidu promete atu hola vítima maski to'o agora parte família seidak autóriza atu sira bele moris hamutuk.

Iha alegasaun finál Ministériu Públiku husu tribunál atu aplika pena ne'ebé justu ba arguidu maski sira hakarak ho hakarak maibé vítima sei iha tinan ki'ik no tuir lei aktu ne'e konsidera aktu ilísitu no atu evita hahalok hanesan ne'e la bele akontese.

Defeza husu Tribunál atu aplika pena ne'ebé adekuaudu no proporsionál ba arguidu tanba arguidu bazeia deklarasaun arguidu no vítima.

Prosesu sentensa agenda fali ba iha 17/4/13, tuku 14:00 lokraik.

4. Krime violénsia doméstika Nú.2/C.Ord /2013/TDO

Kompozisaun Tribunál : Singular
Juis : Dr. João Ribeiro
Ministériu Públiku : Dr. Afonso Lopez
Defeza : Dr. Calisto Tout
Konkluzau : Kondena ho pena multa

Iha 10 Abril 2013, Tribunál Distritál Oe-Cusse hala'o julgamentu ba kazu ofensa ba integridade física simples ho natureza violénsia doméstika ne'ebé rejistu ho Nú. Procesu 2/C.Ord/2013/TDO. Arguidu ba kazu ne'e mak Marcos Nano hasoru nia fen Imelda Oqui, iha 4 Outubru 2012, iha Suco Naimeco, Sub-Distritu Baqui, Distritu Oe-cusse.

Ministériu Públiku akuza katak iha 4/10/2012 iha tuku 9:00 dadersan arguidu basa vítima nia hasan dala rua no baku ho ai pedasuk dala ida iha kanotak no rezulta vítima nia isin lolon moras. Kazu ne'e akontese tanba vítima te'in tarde.

Ministériu Públiku akuza tuir artigu 145 Kódigu Penál kona-ba ofensa ba integridade fizika simple konjuga ho artigu 35 alinea (b) Lei Kontra Violénsia Doméstika.

Arguidu rekoñese faktu sira ne'e, arrepende nia hahalok no promete sei la repete tan iha futuru. Bazeia ba faktu (konfisaun) arguidu nian, nune'é tribunál decide atu la persiza rona tan vítima nia deklarasaun no kontinua ba alegasaun finál.

Iha alegasaun finál, Ministériu Públiku husu tribunál atu kondena arguidu bazeia ba artigu ne'ebé Ministériu Públiku akuza ba arguidu.

Defeza husi ba tribunál atu aplika pena ne'ebé adekua ba arguidu tanba arguidu arrepende ba ninia hahalok, sira diak malu ona no foin primeraves komete krime.

Tribunál aplika pena multa US\$ 30 ba arguidu ne'ebé sei seluk durante loron 30 nia laran, no sei selu US\$ 1 kada loron. Wainhira arguidu la kumpri pena multa ne'e, sei tama kadeia durante loron 20 nia laran.

5. kazu krime maus-tratus ba kónjuje Nú. 71/C.Ord/2012/TDO

Kompozisaun Tribunál	: Kolektivu
Juis	: Dr. Júlio Gantes, Dr. JoãoRibeiro no Dr. José Maria de Araujo
Ministériu Públiku	: Dr. Oscar Tavares
Defeza	: Dr. Calisto Tout
Konkluzau	: Sei kontinua prosesu

Iha 10 Abril 2013, Tribunál Distritál Oe-Cusse hala'o julgamentu ba kazu krime maus-tratus ba kónjuje ho Nú. Prosesu 71/C.Ord/2012/TDO. Arguidu ba kazu ne'e inisiál DM hasoru nia fen MB. Kazu ne'e akontese iha 18 Janeiru 2012, iha Suco Taiboko, Sub-Distritu Pante-Makassar, Distritu Oe-cusse.

Ministériu Públiku akuza katak iha dia 18/1/12 arguidu halo ofensa ba vítima ho meus tuku dala rua iha kanuruk no tebe dala ida iha hasan no dudu monu vítima no rezulta vítima hetan kanek. Arguidu komete aktu ne'e tanba vítima baku sira nia oan ne'ebé halimar bee foer. Vítima konsege ba halo tratamentu iha Óspital Referral Oe-Cusse durante loron tolu.

Iha julgamentu vítima deklara ba tribunál katak arguidu sempre halo hahalok hanesan. Ministériu Públiku akuza tuir artigu 154 Kódigu Penál kona-bá maus-tratus ba kónjuje konjugadu ho artigu 35 alinea (a) Lei Kontra Violénsia Doméstika.

Arguidu rekuñese nia sala no deklara katak nia arrepende nomós promete sei la repete tan iha futuru.

Iha alegasaun finál, Ministériu Públiku husu tribunál atu kondena arguidu ho pena prizaun tinan 2 no suspende ba tinan 3.

Parte defeza alega katak, iha audiénsia arguidu hatudu arrepende ba ninia hahalok diak no sira agora diak malu ona. Bazeia ba sirkunstansia atenuante hirak ne'e, defeza husu atu tribunál aplika pena ne'ebé adekuaadu ba arguidu.

Leitura sententa marka fali ba 17 Abril 2013, tuku 9:00 dadersan.

6. Kazu krime omisídiu simples Nú. 130/C.Ord/2012/TDO

Kompozisaun Tribunál : Koletivu
Juis : Dr. Júlio Gantes, Dr. João Ribeiro no Dr. José Maria de Araujo
Ministériu Públiku : Dr. Oscar Tavares
Defeza : Dr. Calisto Tout
Konkluzau : Sei kontinua prosesu

Iha 10 Abril 2013, Tribunál Distritál Oe-Cusse hala'o audiénsia julgamentu ba kazu omisídiu simples ne'ebé rejistu ho Nú. Prosesu 130/C.Ord/2012/TDO. Arguidu ba kazu ne'e ho inisiál AV hasoru vítima António Vaz (matebian). Kazu ne'e akontese iha 23 Maiu 2012, iha Suco Pasabe, Sub-Distritu Pante-Makassar, Distritu Oe-Cusse.

Ministériu Públiku akuza katak iha 23 Maiu 2012, arguidu baku vítima ho ai pedasuk dala ida iha parte knotak no dala ida iha kanuruk hodi rezulta vítima sofre kanek no bubu iha ulun no knotak. Liu tiha loron tolu vítima mate iha Óspital Guido Valadares, Dili tanba agresaun ne'ebé arguidu komete hasoru vitima.

Iha audiénsia arguidu deklarata katak momentu ne'ebá (dader) vítima ba arguidu nia uma no husu atu rejolve problema. Arguidu hatan ba vítima katak problema ne'ebé iha sira iha fulan tolu liu ba kotuk, rezolve kleur ona. Momentu ne'ebá arguidu fo multa tais ida, fahi ida no karau ida.

Maibé vítima la simu no tuku arguidu nia ibun no baku ho ai kakeu iha kotuk laran. Arguidu konsege monu, maibé depois hader arguidu foti ai pedasuk hodi baku fali vítima tanba vítima atu oho arguidu.

Kazu ne'e akontese tanba vítima diskonfia arguidu halo relasaun seksuál ho vítima nia fen.

Relasiona ho aktu ne'e Ministériu Públiku akuza tuir artigu 138 Kódigu Penál kona-ba omisídiu simples ne'ebé ho nia moldura penál entre tinan 8 too tinan 20 prizaun.

Ministériu Públiku alega katak, arguidu provadu komete agresaun hasoru vítima ho meus baku ho ai pedasuk iha parte kanuruk dala rua no parte knotak dala ida ikus mai rezulta vítima sofre kanek no hakotu vítima nia vida. Ne'e duni husu tribunál atu kondena arguidu ho pena ne'ebé justu tuir artigu 138 Kódigu Penál.

Parte defeza iha nia alegasaun finál husu tribunál atu aplika pena suspensaun ba arguidu bazeia ba sirkunstansia atenuante ne'ebé iha liu husi deklarasaun arguidu rasik iha audiénsia julgamentu nia laran.

Prosesu leitura sentensa marka fali ba 15 Abril 2013, tuku 14:30 loraik.

7. Kazu tentativa omisídiu agravadu Nú.194/C.Ord/2012/TDO

Tribunál Distritál Oe-Cusse
Kompozisaun Tribunál : Kolektivu
Juis : Dr. Júlio Gantes, Dr. João Ribeiro no Dr. José Maria de Araújo
Ministériu Públiku : Dr. Oscar Tavares
Defeza : Dr. Sebastião Amado de Almeida
Konkluzau : Sei kontinua prosesu

Iha 10 Abril 2013, Tribunál Distritál Oe-Cusse hala'ó julgamentu ba kazu tentativa omisídiu agravadu ho Nú. Prosesu 194/C.Ord/2012/TDO. Arguidu ba kazu ne'e inisiál MM hasoru vítima inisiál RT nu'udar nia fen kaben. Kazu ne'e akontese iha 5/9/2012, iha Sub-Distritu Nitibe, Distritu Oe-Cusse.

Ministériu Públiku katak iha 5 Setembru 2012, arguidu atu tá vítima nia kakorok maibé tanba vítima defende ho liman loos nune'é vítima nia liman loos kotu. Arguidu kontinua taa dala ida tan ba parte ulun maibé vítima defende ho liman karuk hodi rezulta vítima liman karuk mós kotu.

Arguidu mós tá iha vítima niaibun no rezulta vítima nia nihan musan 7 monu sai husiibun. Alíende ne'e, arguidu tá mós iha parte matan loos hodi rezulta vítima matan la bele haree.

Aktu hirak ne'e rezulta vítima nia isin loloon sai aleza permanente. Akontesimentu ne'e tanba arguidu diskonfia vítima iha relasaun ho mane seluk.

Arguidu konfesa kona-ba faktu sira ne'e. Maibé deklaratacak nia tá vítima tanba vítima akuza bebeik arguidu kona-ba arguidu hafuhu nia, maski arguidu dehan ona katak nia la hafuhu no la diskonfia vítima. Arguidu mós deklaratacak, tuir lolos nia atensaun atu tá mate vítima, laos atu halo kanek deit.

Iha alegasaun finál Ministériu Públiku husu tribunál atu fó pena prizaun tinan 17 ba arguidu maibé wainhira tribunál fó pena ass liu tinan 17, ne'e sei justu liutan tanba krime ne'e konsidera nu'udar krime ne'ebé grave.

Defeza husu tribunál atu fó pena tinan 15 iha prizaun tanba psikolojikamente arguidu afeta mós nia wainhira kazu ne'e akontese. Defeza mós argumenta katak agora dadaun arguidu nia oan sira hamutuk ho nia inan ne'ebé alezada ona. Aleinde ne'e akontesimentu ne'e mós tanba hetan provokasaun husi vítima rasik.

Prosesu leitura sentensa marka fali iha 23 Abril 2013, tuku 9:00 dadersan.

8. Krime violasaun seksuál hasoru inkapáz-Nú. 11/C.ord/2012/TDO

Kompozisaun Tribunál : Kolektivu
Juis : Dr. Júlio Gantes, Dr. João Ribeiro no Dr. José Maria de Araújo
Ministériu Públiku : Dr. Oscar Silva Tavares
Defeza : Dr. Sebastião Amado de Almeida
Konkluzau : Absolve

Tribunál Distritál Oe-Cusse iha 11 Abril 2013, hala'o julgamentu ho agenda lee leitura sentensa ba kazu violénsia seksuál ho Nú. Prosesu 11/C.ord/2012/TDO, ne'ebé akontese iha 8 Marsu 2012. Arguidu ba kazu ne'e DT F hasoru vítima RU, iha Pante-Makassar, Distritu Oe-Cusse. Vítima ba kazu ne'e sofre problema saúde fíziku (ain-liman kleuk ka la normál tanba liman-ain ki'ik) no la iha kbi'it atu reziste.

Tribunál prova katak vítima hetan violénsia seksual maibé laos arguidu mak autór. Mesmu iha audiénsia vítima deklara katak arguidu mak nu'udar autór ba kazu ne'e, maibé depois kazu ne'e akontese liu tiha loron tolu. Arguidu mós deklara katak iha loron ne'ebá vítima refere, nia iha fatin seluk hamutuk ho nia kolega sira.

Vítima deklara atak, iha akontesimentu arguidu hatais kamiza ajul no kalsa levis ajul.

Testemuña Antónia Tefa no Fernando Kolo haktuir katak, sira la haree ho matan kona-ba akontesimentu ne'e, maibé sira haree arguidu mak iha tempu ne'ebá besik fatin akontesimentu no kalsa levis mutin no kamiza azul.

Tanba provas ne'ebé produs iha audiénsia hamósu dúvidas ba tribunál, ne'e duni tribunál absolve kazu ne'e.

9. Kazu krime seksuál hasoru adolxente Nú.10/C.Ord/2013/TDO

Kompozisaun Tribunál : Koletivu
Juis : Dr. Júlio Gantes, Dr. João Ribeiro no Dr. José Maria de Araújo
Ministériu Públiku : Dr. Oscar da Silva Tavares
Defeza : Dr. Sebastião Amado de Almeida
Konkluziun : Sei kontinua prosesu

Iha 11 Abril 2013, Tribunál Distritál Oe-Cusse hala'ó julgamentu ba kazu violénsia seksuál ba minoridade ne'ebé rejista ho Nú. Prosesu 10/C.Ord/2013/TDO. Arguidu ba kazu ne'e ho inisiál ESI hasoru vítima ACS. Kazu ne'e akontese iha, 30 Agostu 2012, iha Pante-Makassar, Oe-Cusse.

Ministériu Públiku akuza katak iha 30 Agostu 2012, maiz ou menus tuku 20:00 kalan, arguidu lao liu husi vítima nia uma kotuk no hakfuik hodi fo sinal ba vítima tanba sira promete malu ona antes.

Vítima sai hasoru arguidu, maibé hafoin to'o arguidu kaer vítima no lori ba karau luhan hodi hasai nia kalsa no ropa hodi obriga no halo relasaun seksuál to'o arguidu nia sperma sai. Vítima koko hakilar maibé arguidu taka metin vítima nia ibun ho liman.

Bainhira kazu ne'e akontese vítima foin tinan 15 no arguidu iha tinan 18. Aktu ne'e, resulta vítima sofre trauma to'o agora no moe atu ba kontinua nia estudu. Relasiona ho akontesimentu ne'e, Ministériu Públiku akuza arguidu tuir artigu 178 Kódigu Penál kona-ba aktu seksuál hasoru adolxente ne'ebé ho nia pena prizaun too tinan 5.

Arguidu deklarara katak akontesimentu ne'e la'os violénsia seksuál maibé hanesan abuzu seksuál deit. Arguidu deklara katak nia lamas deit vítima nia isin sensitivu. Arguidu haktuir tan katak antes ne'e mak sira halo relasaun seksuál maibé relasaun seksuál ne'e sira halo tanba iha ona konkordansia ba malu.

Mesmu nune'é, tuir deklarasaun vítima ba tribunál katak iha 30 Agostu 2012, kalan arguidu halo duni relasaun seksuál ho obriga hasoru vitima. Vítima rejista deklarasaun arguidu nian katak antes ne'e nia halo ona relasaun seksuál ho arguidu ka mane seluk.

Iha alegasaun finál, Ministériu Públiku husu ba tribunál atu fó justisa ne'ebé justu ba arguidu tuir artigu ne'ebé Ministériu Públiku akuza ona ba arguidu.

Defeza husu ba tribunál atu fo pena suspensaun ba arguidu, tanbá deklarasaun ne'ebé mai husi arguidu no vítima hamósu dúvida no deklarasaun sira ne'e kontráriu ba malu durante audiénsia julgamentu.

Leitura akórdaun marka fali iha 15 Abril 2013 tuku 14:00 loraik.

10. Kazu krime abuzu konfiansa Nú.197/C.Ord2012/TD

Kompozisaun Tribunál : Kolektivu
Juis : Dr. João Ribeiro, José Maria de Araújo no Júlio Gantes

Ministériu Públiku : Dr. Oscar Tavares
Defeza : La marka prezensa
Konkluzau : Adiadu

Iha 12 Abril 2012, Tribunál Distritál Oe-Cusse la konsegue hala'ó prosesu julgamentu ba kazu abuzu konfiansa ne'ebé rejista ho Nú. Prosesu 197/C.Ord/2012/TDO. Arguido ba kazu ne'e nain rua ho inisiál BT no SdR husi Fundasaun Fatu Sinai Oe-Cusse.

Prosesu julgamentu ba kazu refere la konsegue realiza, tanbá advogadu ne'ebé mak reprezenta arguidu la marka prezensa. Tribunál seidauk dertemina oráriu julgamentu foun ba kazu ne'e.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minhub.org

Landline: 3323883

FB: Jsmp.timorleste

www.jsmp.tl